

شَمَائِلُ شَيْخِ جَهَانَكَ

عَلَيْهِ صَلَوَاتُ الرَّحْمَنِ

مؤلفی وطابع وناشری :

الحاج حافظ اسماعیل حق

دیوریک



باب فتوایناھینک تصدیقیلہ طبع اولنشدن

732760



مہر سز نسخہ لہر ساختہ در . متجاسری دخی قانون
عدالتلہ مسئولدر



در سعادت

محمود ملک رطبی 287.924

186

1326

K1

1326



اعوذ بالله من الشيطان الرجيم

بِسْمِ اللَّهِ الرَّحْمَنِ الرَّحِيمِ

أَلْحَمْدُ لِلَّهِ الَّذِي اصْطَفَى مُحَمَّدًا صَلَّى اللَّهُ عَلَيْهِ وَسَلَّمَ
صَفْوَتَهُ * وَقَرَضَ الْإِسْلَامَ أُمَّتَهُ * وَالْكَفَمَةَ قَبْلَتَهُ *
وَجَعَلَ خَيْرَ النَّاسِ أُمَّتَهُ * وَسَلَّقَ إِلَى الْجَنَّةِ زُمْرَتَهُ *
وَأَنْزَلَ عَلَيْهِ صَلَاتَهُ وَرَحْمَتَهُ وَبَرَكَتَهُ * وَصَلَّى اللَّهُ عَلَى
مُحَمَّدٍ النَّبِيِّ الْأَمِيِّ الْهَاشِمِيِّ الْقُرَيْشِيِّ الْمَكِّيِّ الْمَدِينِيِّ الْعَرَبِيِّ
صَافِي زَبْتِهِ * وَعَلَى آلِهِ الطَّيِّبِينَ الطَّاهِرِينَ وَسَلَّمَ تَسْلِيمًا
كَثِيرًا أَبَدًا *

(وبعد) شمائل حضرت رسالتناهی باینده قدیم
وحدیثاً تألیف اولنان کتب شمائل محمدیه وبخصوصه
خلفاً وسلفاً تصنیف واملا اولنان زبر خصائل احمدیه
یک چوق ایسهده بودفعه خالصاً لوجه الله وطلباً لمرضاة الله
واستشفاعاً عن رسول الله فائدهسی عامه وعائدهسی نامه
اولمق امیلیه (شمائل شمس جهان) اسمیله توسیم ایلدیکم
شوا اثر عاجزی بی کتب احادیث نبویه دن استنباط
ایده رک جمع وترتینه مسارعت ، و دیار مزده زبان زد
اولان لسان ترکی اوزره تحریرینه مبادرت ، وایکی باب
تقسیماً باب اولده احسن موجودات علیه اکل التحیات
افندمنک شکل وشمائل شریفه وتناسب اعضای لطیفه
وحسن صورت مخصوصه سنی علی وجه الترتیب ، که رأس
سعادت نبوتیناهیارندن قدم شریفلرینه قدر صره سیله
هر بر اعضای جمیله سنی ، باب ثانیده دخی اخلاق حمیده
وافعال حسنه واعمال صالحه سنی من غیر حد و لیاقة
بالیان (دلیل الحاج فی مناسک الحج) نامیله بنام اولان
اثر عاجزی به برضیمه اتخاذ ایلدم .
کتاب عاجزی بی مطالعه بیوران اخوان دیندن
نیازم بودرکه کتابک ترتیب وافاده سنده واقع اولان سهو

وخللته مطلع اولدقلرينده اصلاحنه سعي وصلاحنه حمل
بيوروب بو بعد فقيري ذكر جميل ايله ياد و دعای خير ايله
دلشاد بيورولر . ان الله لا يضيع اجر المحسنين .
همان جناب رب متعال ، پادشاه دريا نوال ، شهنشاه
حميد الحصال افندمن حضرتلريني الى اخر الزمان كال
صحت و عاقبتله تخت عاليبخت هايونلرنده دائم و برقرار
بيورسون آمين . بجرمة سيد المرسلين . ومن الله التوفيق
وهو نعم الرقيق .

الحاج حافظ اسماعيل حقي

ديوربي



اعوذ بالله من الشيطان الرجيم

بِسْمِ اللَّهِ الرَّحْمَنِ الرَّحِيمِ

أَحْمَدُ لِلَّهِ رَبِّ الْعَالَمِينَ . وَالصَّلَاةُ وَالسَّلَامُ عَلَى رَسُولِهِ لَنَا
مُحَمَّدٍ وَآلِهِ وَصَحْبِهِ أَجْمَعِينَ .

(نعت شريف)

- (بوجسم آتش عشقكله يانسون يارسول الله)
- (دو چشم خاب غفلتن اويانسون يارسول الله)
- (كيدوب بوينده زنجيرمله بن اول روضه ياكه)
- (كورنلر هپ بن ديوانه صانسون يارسول الله)
- (اورتبه آغليم چوللرده فرياد ايليم بن كيم)
- (سرشك ديدم آل قانه بويانسون يارسول الله)
- (شو كافر نفس انندن بودل بيچاره ني قورتار)
- (يتر جرم وقباحندن اوصانسون يارسول الله)
- (قولك اسماعيلي محشر اهله سن ايلمه رسواي)
- (كناهندن بودنياده اوطانسون يارسول الله)

باب اول

(حضرت فخر عالم صلی الله علیه وسلم افدمز
حضرتلرینک شکل و شمائل شریفه و تناسب اعضای
لطیفه و حسن صورت مخصوصه سی بیاننده در)

حضرت رسول اکرم کمال خلقی، و جمال صورتی
و جسم شریف پر انورلرینک حسن و لطافتی، افراد نوع
نبی بشرده قطعاً مفقود و آنلردن ممتاز اولدیفنی بیلمک
نبی ذیشان افدمزه کمال ایمان و تمام اعتقادند در .

منبع حسن و جمال، محبوب خدای تعالی افدمزک
کافه اعضای شریفه لری حسن و جمالده و عامه جوارح
لطیفه لری مرتبه کالده اولوب قلب انورلردن طلوع ایدن
شمس حقیقتک ضیائی وجه پاک صیخنده ظاهر ایدی .
حضور پر نور شریفلرنده ایقاد فانوس و سراج اولنسه
یا خود قر طالع و یا شمس بازغه اولسه، نور جمالی انوار
فانوس و سراجی و شعشعه قر و شمسی محو ایدر ایدی .
جناب رسالتناه افدمز بر وجود ذی کمال،
بر صنع بدیع صاحب الجمال اولغله قامت شریفلری
طول مفرط و قصر بیننده متوسط، که مبارک بو یارینه

وهله اولی ده نظر ایدن کیمسه حضرت رسول اکرمی
اورته بو یلی ظن ایدر لکن امان نظر دن صکره طوله
قریب دیو حکم ایدر ایدی . هر کیمه هر اه اولسه لر
اول کیمه دن طویل، و ایکی طویل القامه بیننده توسط
ایسه لر ایکیسندن دخی طویل کورینه نور ایدی، که
بو کیفیت حضرت رسول اکرمک معجزات باهره سندن در .
یعنی من حیث الصورة الظاهرة امتدن برفرد ذات
نبوتنپناه یارینه موازی اولمدقلری کی کذلک من حیث
السیره والمعنی دخی معادل و مساوی اولمدقلرینی اشعاردر .
والحاصل حضرت رسول اکرمک اندام دل آراملری
متناسب و اعضای لطیفه لری متقارب و اعتدال قامتلری
بغایت دلنشین اولدیفنی یقیناً ظاهر در .
نبی محترم افدمزک جسم مبارک لرینک رنکی اسمر
اولیوب قرمز یلق ایله مختلط نورانیت و اضائی جامع
اولقله سراپا سیم صافدن دوککش جسمه بکزر ایدی .
لون عامه اعضا ورنک کافه اجزالی بیاض، بعض
اعضای لطیفه سنده تأثیر شمسدن و کثرت دمندن حررت
اولقله ازهریت و اسمریت حاصل اولور ایدی .
جناب رسول کبریا افدمزک رأس سعادتلری عظیم
ایدیکه رأسک عظمتی کمال قوای دماغیه دلیلدر .

حضرت رسول اکرم افدمزك موی عنبر بوبلری یعنی عنبر قوقولی مبارك صاچلری سیاه ، نه قیوبرجق ونه دوز ، ایکیمی بیننده معتدل اولوب عنبر رایجھلی مبارك صاچلرینی کسمدکلری وقت مبارك قولاقلری یومشاغنه واصل اولور ایدی .

نجی ذیشان افدمزك مبارك آنی و آلتنک ایکی طرفی روشن وکشاده ، طولاً و عرضاً تمتد وواسع ایدی . حضرت رسول اکرم صلی الله علیه وسلم افدمزك مبارك قاشلری اوزون وایجھه و مُقَوَّس و زیاده کامل و تام بری برینه ملاقی اولمغه قریب لکن ملاقی وچاتق دکل ، بری برینه مقرون و متصل کورینور ایسهده امعان نظر اولندقمه ایکی ابروی هایونلری آرهسنده فرجه رقیقه محسوس اولور ایدی . ایکی ابروی هایونلری آرهسنده برطمر دخی وار ایدیکه حین حلمیتلرنده اول طمر غیر محسوس اولوب آخجق وقت غضبیلرنده ظاهر و نمایان اولور ایدی .

حضرت سید کائنات افدمزك مبارك کپرکلری کثیر و مستطیل ، دیده مبارکلری بیوک و بکلری بغایت سیاه و بیاضنده آزه جق حرمت وار ایدی ، که بوده کوزده

زیاده سیله حسن و ملاحتی موجبدر . کوندوز شعاع شمسه نصل کورورلر ایسه کیچه ظلمت لیده دخی اویلیجه کورورلر ، اوکلرنده بولسان اشیایی رؤیتلری کبی آرقه لرنده کی اشیایه دخی عینله علم و واقف اولوب کورورلر ایدی .

نجی ذیشان افدمزك برونلری بغایت لطیف و موزون ، و اوجی رقت و لطافت اوزره اولوب اورته بری بره مقدار یوکسک ایدی ، که کمال حسن دخی بو هیئنده در . اتف سعادت رسالته پایلرینه نظر ایدن کیمسه وهله اولیده حضرت فخر عالمی برونی یوکسک ظن ایدر لکن امعان نظر دن صوکره آقنی اولدیفته عالم اولور ایدی .

جناب رسالتمآب افدمزك مبارك یوزلری مرتفع و زیاده مدور دکل بلکه جزئی دکرمی دوز ایدی ، که کمال حسن بوشکلده اولمقله وجه پرانورلری جمیع ناسک یوزلرندن کوزل حتی کونش نوری آقارجه سنه ماییح الوجه ایدی . رسول الثقلین افدمز حد ذاتنده عظیم القدر اولمقله صدور بشرده دخی معظم ، جمال پر انورلرینه نظر ایدن ناظرینک قلوبنده مفتح ، ووجه

سعادت‌تاری غایت نورانی و لامع ایدیکه ایله بدرده قر
لمعان ایدرجه‌سه لمعان و اشراق ایدر ایدی .

احسن مخلوقات افندمزه عالمه مماثل برشی یوق
ایکن جمال بی نظیر و روی دلپزیر لرینی قره تشبیه عادت
شاعران اوزره مبنی اولوب تشبیه مذکور دن مرام
حضرت رسول اکرمک وجه انور لرینک حسن و لمعانی
تعلیم و تمثیل طریقله سلمینک ذهنلرینه تفهیمدر .

حضرت جابر رضی‌الله عنه بیوردیلرکه : بن سراج
طالم صلی‌الله علیه و سلم افندمزی قرمزی لباس ایله ملبس
اولدقلری خالد بره‌نهاب کیچه‌ده کوردم . وجه منیر
نبوی ایله قردن هانکیسندنه حسن کامل اولدیفنه مطلع
و واقف اولمق ایچون کاهی وجه جیل حضرت رسول
اکرمه و کاهی چهره قره نظر ایتدم . والله بسم‌عندمه نبی
محترم حضرت لرینک وجه سعادت‌تاری قردن ده کوزل ایدی .

جناب أَفْصَحُ الْفَصْحَا اقدمزک مبارک آغزی نه بیوک
ونه کوچک بلکه ایکسی بپننده متوسطه و مبارک دیشلری
سیرک و انجو کبی بیاض و براق اولقله انشای تکلم لرنده
مبارک دیشلری آرسندن نور صاچیلور ایدی . مبارک
دوداقلریله فر سعادت‌تاری قبادقلری زمان مشاهده اولنان

هئت لطیف‌لری شول مرتبه حسن و لطافت اوزره ایدیکه
افراد بشر دن هیچ کیسه‌یه مخصوص دکل ایدی .

اسان حکمت بیان‌لری صدق لهجه و سلاست ادا ایله
مشحون اولوب قوت فصاحت و وسعت بلاغته مالک ،
کلام شریف‌لری کواکلری آلیر و روح‌لری جذب ایدر ،
مخلوقات ایچروسنده اصلاً و قطعاً کندولرندن افصح
و بلیغ کیسه اولماقله برابر بالجه فصاحت لسان و بلاغت
زباننک غایت عقول بشر واصل اوله مز ایدی . فصحای
عربدن هر فصیح تقدر فصاحتده کامل اولسه ینه کندوسنک
منسوب اولدیفنی قبیله‌نک لغاتی بالضبیط آنلرک ادا
و شیوه‌لری اوزره اجرای کلام ایدر لکن حضرت رسول
اکرمه هر نه کونا کلام عرض اولسه اول کیسه‌یه کندی
لغتی و اسلوبی اوزره سوق کلام ایدر لر ایدی .

حضرت فخر عالمک عامه اقوالی (وَمَا يَنْطِقُ عَنِ الْهَوَىٰ
إِنْ هُوَ إِلَّا وَحْيٌ يُوحَىٰ) نص و فتنجه بلیغه و فصیح‌ه و کافه
افعالی (إِنَّكَ لَعَلَىٰ خُلُقٍ عَظِيمٍ) قول منظوم فتنجه پسندیده
اولدیفنی شوب شبه‌دن عاریدر . فصل بویه خصائصه مالک
اولماسونکه لسان فصیح‌لری سیوف خلاق عالمدن مجلا
برسیف اولوب مراد الهی و جمیع اوامر و نواهی ، فرائض

وسن انکله روشن ومین ، طریق رشد وسداد ، منهاج
 مبدأ ومعاد انکله ظاهر وروشن اولشدر . حتی شول
 مرتبه افصح اللسان ووضح الیان ایدیکه حضور عالی
 نبوتیناهیلرنده بولنوب زمان تکلملرنده فم سعادت
 نبویلرندن صدور ایدن کلمات شریفه فی استماع ایدن ذوات
 اول کلام درر باری حفظ ایدر . واول کلمات شریفه نک
 تعدادینی مرام ایدنسه اکا حرف بحرف تعداد قابل واسهل
 اولورایدی .

حضرت رسول اکرم صلی الله علیه وسلم افسدیمزک
 مبارک توکروکاری معجزات عیدیه فی جامع وخصائصی
 حاوی ، وصوت رسالتیناهیلری احسن الاصوات اولوب
 غیریلرک آوازی واصل اوله مدینی محله ذات اقدس لرینک
 کوزل صوتلری واصل اولور ایدی .

نبی آخر الزمان اقدمزک حیة سعادتلری بقایت سیاه
 وگور ، نه قویرجق ونه دوز ، ایکیمی بیننده . معتدل
 اولوب ذات عالی نبوتیناهیلرنده موجود اولان کثرت حلم
 ووقارندن ناشی جمال پرانورلرینه بقته نظر ایدن کیمسه یه
 هبت عارض اولور . کمال احمدیلرینی توصیف و اخلاق
 حمیده لرینی تعریف ایدن کیمسه عجزینی مقرر وقصوری

•عترف اوله رقیب : فخر کائنات اقدمزدن اول وصوکره
 ذات رسالتیناهیلرینه صورتاً و سیرتاً ، خَلْقاً وَ خُلُقاً مشابه
 کیمسه کورمدم دیرایدی .

جناب سرور کائنات اقدمزک مبارک بویونلری غایت
 لطیف و معتدل و مبارک کردانلری بللور کچی صاف
 و براق ایدی . عادت سنیه لری ، برشیه نظر بیوردقلری
 وقت مبارک کردانلرینی یمین و شماله چویرمزلر بلکه
 جمیع بدن و جمله اندام و تنزلیله اقبال و توجه ایدرلر .
 و بر کیمسه یه مکاله ایچون توجه بیورسه لر مجموع جوارحیه
 توجه بیوروب یالکنز رأس سعادتلرینی چویرمه که نظر
 بیورمزلر ایدی .

نبی ذیشان اقدمزک عظام مفاصلی ، که مبارک
 اوموزلری و دیرسکلری و بیلکلری و دیزلری بیوک
 کیمکلی ایدی . عظامک عظمتی ، علامت قوتدر . حضرت
 رسول اکرمک مبارک اوموزلرنده و قوللرنده شعر کثیر
 وار ایدی و مبارک قوللری دیرسکدن بیلکه قدر اتلی
 و مبارک بیلکلرینک ایکی طرفنده کی کیمکلری طویل
 ایدی .

حضرت فخر عالم صلی الله علیه وسلم اقدمزک دست

شریفزاری بیوک و اتلی و مبارک آووچلاری واسع ایدی .
وسعت راحه ، علامت سخادر . و مبارک پارمقلاری قالین
و علی وجه الاعتدال اوزون ، خصائص سینه لرندن اوله رق
دست شریفزاری قاردن صغوق و حریردن یومشاق
و مسکدن خوشبوی ، هر هانکی شیئی دست مبارکارلیه
مسح بیورسه لر علتدن بری و شقایب اولور ایدی .

جناب ازهد الانبیا افندمزک مبارک قولتوق آلتلری
بیاض ، قیلدن پاک و بری و مبارک ایکی کورکارینک آره سی
و سعتلی ایدی ، که اعتدال اوزره اوموزلر ارسنک
وسعتی علامت نجات و نشانه سیادتدر .

جناب خاتم الانبیا افندمزک ذات نبوتیناهیلریه
سلسله نبوت ختم و ختام بولدیغنه تنبیه ایچون مبارک
کورکاری ارسننده و حذاء قلب انورلر زنده کورک جین
یمورطه سی جسامتنده خاتم نبوت اوله رق بر قبارجق
وار ایدی که اوده جسم شریفزاری لوندنه لطیف قیلار
صاحی و جسم شریفزارندن یوکسک و اطرافنده
انجو کبی بگلر اولقله (خاتم نبوت) اسمیله مسمی
و مشهور ایدی .

حضرت رسول اکرم افندمزک مبارک کورکسندن

لطیف کوبگلرینه قدر اورته یرده شق صدر علامتی
اوله رق لطیف قیلاردن الف کبی برخط موجود اولوب
صدر شریفزاری اوزرنده آندن بشقه قیل یوق ایدی .
مبارک بطن پاکیه اونازک سینهلری مساوی یعنی
مبارک قرنی کوکی اوزرینه و مبارک کوکی قرنی
اوزرینه زائد دکل ایدی ، که کرک سینئه رحمانلری
و کرک بطن پاکلری یصی و واسع و نور ساطع کبی لامع
ایدی . حاصلی : جمیع اجزاسی مطبوع و محبوب و جمله
اجزاسی متناسب ، بدن مبارکاری نه سمیز ونه ضعیف
اولقله بالجمله اعضای شریفزاری غایت معتدل و یراشقلی
ایدی .

جناب احسن مخلوقات افندمز افراد آفریده نک
جمله سنک احسنی اولدیقندن مبارک معظم و مکرم قلب
عایلیری حقدنه دخی متعدد آثار و اخبار وارد اولمشدر .
حضرت رسول اکرم افندمز مخلوقات ساژهدن
ممتاز اوله رق جسم شریفزاری بعض صفت مختص ایدی که
نفس نفیسه احمدیه لرینک احوال و اخلاق کریمه سنه
دلیل و اخلاق حمیده سی قلب مقدسنده کی اسرار الهیه
علامت و نظرگاه الهی اولمش ایدی .

قلب سعادت سنیه‌لی معراجہ عروج‌لرندن مقدم
انیای سابقه‌نک قلبی منزله‌سندہ بعضاً طارلور و برزمان
صوکره وسعت حاصل اوله‌رق معامله‌ حق و خلقه تحمل
ایدر ایدی . هجرتدن برسنه مقدم معراجہ عروج‌لرندہ
ملائکہ مقریندن جبرائیل (علیه السلام) حضرت
رسول اکرمک صدر عالی نبوتناہیلرینی شق ایده‌رک
قلب‌انورلری ایبروسندن برپارہ اوپوشمش‌قان چیقاروب
(پارسول‌الله) شیطانک نصیبی سندن بودر . بوکتدکن
صوکره شیطان پرتلیس اصلا سکا ظفر بوله‌منز دیش
وبر آلتون لیکن ایچندہ قلب‌انور رسالتناہیلرینی آب
زمزم ایله بعدالغسل یرینه وضع ایلمشدر .

ایشته بوشق صدردن صوکره حضرت فخر عالمک
صدری دائماً منشرح ، انس وجنه وظائف نبوت
ورسالتی مبلغ ، قلب شریفلری جمیع هموم واضطرابدن
آسودہ ، سرور و غموم زمانلرندہ برحال و برسیاق اوزرہ
ایدی .

جناب رحمت جهان افندمزک ساق مبارکلرندہ یعنی
مبارک بالیدرلرندہ نوعماً ایچہک وار ایدی ، کہ حسن
کمال دخی بوہیتدہدر .

جناب رحمت انام افندمزک قدم شریفلری بیوک
واوزرلری دوز، مبارک اوکچهلرینک اتی آز و مبارک
طبانلرینک آلتی دوز و یومشق و علی وجه الاعتدال
یوکسک ، مبارک پارمقلری قالین و علی وجه الاعتدال
اوزون و باش پارمق یانئدہک پارمقی سائر پارمقلرندن
اوزون اولوب آباق جهتدن دخی نوع بشرک‌غایت کوزہ‌لی
ایدی .

عادت سنیه‌لی ، یورودکلری وقت مبارک آباق‌لرینی
زمیندن قوتله‌قالدیروب سمت مطلوبه توجهله‌صاغ‌وصولارینه
میل ایتمزلر ، مبارک آباق‌لرینی بصدقلری وقت مجموعیله
بصوب آباق اوجیله ظرافت قصد ایده‌رک یورومزلر
بلکہ مکان عالیدن نزول ایدرجه‌سنه یالکیز قداملرینه
میل ایده‌رک یورورلر ایدی .

حاصل کلام و خلاصهٴ مرام جناب رحمت موجود
صلی‌علیه‌المعبود افندمز مغرور حسن و جمال ، مسرور
فیض و کمال اولیبووب دائماً متواضعانه حرکت ،
اطوار کبر و نخوت اراٹسندن توفی و مجاہتله آدیملرینی
ایری ایری آتہ‌رق کمال سکونتله یورورلر ایدی ، کہ
ذات نبوتناہیلرینه مخصوص اولان طور و رفتار غایت

مطبوع اولدیغندن یورویشرلی خصوصتک جمیع
احوالنده کمال لطافت و اعتدال اوزره ایدی .

ایشته بویابده ذکر اولنان شمال رسالتیناهی بی
برکیمسه حقیه مطالعه ایدوب خزینته خیالنده حفظ ایتسه
جناب اجل کائنات افدمزک ذات اقدس هایونلرینی وجسم
پاک برانوزلرینی کوز اوکنه کتیریر . بناء علی هذا
حضرت رسول اکرمه محبتی مزداد اولقله عالم منامده
کل جاننک مشاهده و مطالعه سنه مظهر و موفق اولور .
اللهم یسر لنا زیارة روضة حبیبک مرة بعد اخرى ،
ورؤية جماله فی الرؤیا . وشفاعته یوم الحشر والجزاء .
و مجاورته فی جنه الفردوس هی دارالبقا . و صلی الله
علی سیدنا محمد واله و صحبه و سلم تسایماً کثیراً ابداً .



بِسْمِ اللَّهِ الرَّحْمَنِ الرَّحِيمِ

﴿ باب نانی ﴾

(حضرت رسول اکرم صلی الله علیه و سلم افدمز)

(حضرتلرینک اخلاق حمیده و افعال حسنه)

(و اعمال صالحه سی بیاننده در)

﴿ فصل اول ﴾

(جناب اشرف الوری افدمزک عمامة شریفلری)

(و خضاب مبارکلری بیاننده در)

نی آخر الزمان افدمز رأس سعادتلرینه بیاض ،
بعضاده سیاه صاریق صارارلر ، بعضاً ایکی اموزلری
آرسندن بر علاقه صارقدیرلر ، بعضاده صاریقسر
یالکنز تقیه کیرلر ایدی . ایام سائرده صاردقلری
صارغک طولی یدی ، جمعه و عیدین کونلرنده کی عمامة
شریفه نک طولی اون ایکی ذراع ایدی .

جناب رسالتب افدمز عنبر رایجه لی مبارک
صاچلرینی کوزل قوقولی یاغ ایله اکثر یاغلر ، یاغ
سوردکن صوکره عمامة شریفلرینی اثر یاغدن محافظه
ایچون کمال لطافت و نظافتلرندن عمامة شریفلری آلتنه
دلبنده وضع ایدرلر ، اثر یاغ عنبر قوقولی صاچلرندن
زائل اولدقده اول دلبنده اخراج ایدرلر ایدی .

رأس سعادتلرندن اغارمش قیل قوبارمنی سومزلر ،
مبارک صاچلرینی قنا ایله بویایوب بشقه برشی ایله بویامزلر
قنا استعمال بیوردقلرینک سبی ایسه محضاً تطیب و دفع

صداع وجوازینی بیان ایچون ایدی . حضرت رسول اکرم نظافت بدن جهندن جمله ناسک زیاده نظیفی و لطافت تن جهندن جمیع مخلوقاتک زیاده لطیف اولدقلرینه بناءً طوری مطبوع ولباسی پاک ویاکیزه ایدی .

﴿فصل نانی﴾

(جناب احسن موجودافندمن حضرتلرینک)

(تحمیلری بیاننده در)

رسالتپناه افندمنک چشم انور سعادتلری قدرتدن سرمه لی ایکن هرکیجه اویقودن مقدم (ائمد) تعبیر اولنسان سرمه ایله مبارک صاغ و صول کوزلرینه اوچر دفعه سرمه چکرلر و اویقودن قالدقدن صوکره آبدست آلیرکن نفس سرمه زائل اولوب اثرباقی قالیر ، وائمه ملازمت و آننگله اکتحاله مداومت ایدیکنز زیرا ائمه ایله اکتحال کوزه جلا ویریر و کپرکلی بئیریر بیورورلر ایدی .

سرمه چکمک قبل انوم سنت اولوب بعد انوم سنت دکلدر . سرمه بی اویقودن مقدم اوچ کره صاغ و اوچ کرهده صول کوزه چکمیلدر ، که صباحلین آبدست

آلسدقدیم نفس سرمه زائل و اثری باقی قالورکه سنت اولانده بودر . لیکن رجالدن بوسنتی اراده ایدن کیمسه تک معالجه قصدیله اکتحال اتمسی لایق اولوب نساء کبی مجرد زینت قصد ایتامسی لازمدر .

ائمد : قرمزی یه مائل برسیاه طاشددرکه حتجازده چوق بولنور لیکن اعلاسی اصفهانده اولور . حتی بعضیاری ائمه سرمه اصفهانی ذیرلر . ائمدک فوائدی : کوزدن یاش آقنی کسر ، اعصاب چشمی محکم قیلار ، باشدن نازل اولان مواد ردیه بی بالازاله کوزک سختی حفظ ایدر ، کوزه جلا ویریر و صاف ایدر ، کپرکلی بئیره رک کوزه قوت ویریر ، بیرلره و صدیانه غایت نافعدر . بناءً علی ذلک بی ذیشان افندمن امتلرینه سرمه چکمک ایله امر بیوردیلر .

بزینه صدهده کلهلم . حضرت رسول اکرم افندمن اطراف وجوانبه نظر ایتمزلر ، حتی امور مباحه یه دخی کوشه چشم ایله عطف نگاه ایدرلر ، روی زمینه نظرلری جانب آسمانه نظر لرندن اکثر ایدی ، که بوده نهایت تواضع و زیاده خضوع ورب العالمین دن بغایت حیاسندن ایدی .

❖ فصل ثالث ❖

(حبیب خدای علام افدمز حضرت تریسک)

(کلام شریف تریسک کیفیت بیاننده در)

حضرت رسول اکرم افدمزک صمت وسکوتی
 غالب ، لغویات ومالایعنی دن متجانب ایدی . زمان
 تکلمارنده کلام لطیفاری غایت حساب وتائی اوزره
 ایدیکه سوزی احتیاجه کوره سویلر ، ثوابی قصد
 ایتدیکی برشیده سوز سویله مزلر ایدی . سوز سویلرکن
 مبارک الیه اشارت بیوررلر ومجلس ملائک انیسلرنده
 بولسانلر کمال ادب له سکوت ایدرهک باشلرنی اشانغی
 اکرلرلر وایجابنده برسوزی اوچ کره تکرار ایدرلر ایدی .
 اصحاب کرامک دنیا وآخرته متعلق بحث ایتدکلری
 شیدن بحث ایدرلر ، تبشیر وتیسیره دلالت ایدن سوزی
 سورلر ، تنفیر وتعسیره متعلق کلماتدن خوشلاشمزلر ایدی .
 قلاباً ولساناً ذکرالله الیه اشتغال ایدرلر ، کیمسه نیک
 لاقردیسنی کسمزلر ، کیمسه یه سوز ویابشقه برشی ایله جفا
 ایتزلر ایدی . غریب الدیار اولانلرک سؤال وکلاملرنندن
 وقوعه کلان اذیته صبر وتحمل ایدرلر . لعب مباحی کورور
 انکار ایتزلر ، بعضاده مزاج ولطیفه ایدرلر ایدی .

❖ فصل رابع ❖

(سراج عالم صلی الله علیه وسلم افدمز حضرت تریسک)

(ضحک لطیف تریسک کیفیت بیاننده در)

حضرت رسول اکرم افدمزک وجه جمیل انورلری
 بشوش واکثر احوالنده تبسمی غالب ودائم ایدی .
 وحیک نازل اولمدیغی ، خطبه ده بولمدیغی ، یوم قیامت
 تفکر ایتدیکی ازمنده هان دائماً متبسم اولمقله نواجذی
 کورونه چک قدر کولدلکلری نادرآ واقع ایدی .
 بناء علی هذا مؤمن کامل ، افعال سید البشر افدمزه
 اقتدا واتباعاً آوان ضحکده تبسم ایدواب افراطله
 کولمه مکدر . لکن گاه گاه مقتضای بشریت اولمق اوزره
 برامر عجیب ادراکننده ضروری کولمک واقع اولسه
 برشی لازم کلز بلکه کراهت اعتیادده در .

❖ فصل خامس ❖

(سید کائنات علیه افضل التحیات افدمز)

(حضرت تریسک بکلری بیاننده در)

بی ذیشان افدمزک آغلملری دخی کولملری کبی
 اعتدال اوزره اولوب خشوع وخضوعده درجه کماله بالغ

اولدقلری جہتلہ خوف و تعظیم کبریا ، شوق و محبت جناب خدا ملابسہ سیلہ قلب ہایونلرینک نالہ و اینی ظاہر اولور واکر بنم بیلدیکی سز دخی بلمش اولسہ ایدیکنز ہیچ بر وقت کولیوب ہان آغلاردیکز وعظمت کبریادن قوررق مقتضای بشریت اولدیغنی بیان وافادہ بیورورلر ایدی .

انہای طاعت و عبادتہ قلباً بکا اتمک عادات کریمہ لری جہلسدن اولوب بعضآدہ نماز قیلارکن قلب شریفلرینک غایانی ایشیدیلور ایدی .

قرآن کریم تلاوت اولنورکن مؤدای آباتی فکر و ملاحظہ بیوررق دخی معناد حکمت اعتیاد شریفلری اولدیغندن قرآن جلیلی او قودوب استماعی سورلر وفرقان میننی دیگرکن رقت قلبارندن ناشی چشم انورلرندن یاش دوکرلر ایدی .

موتایہ دخی آغلامق عادات شریفلرندن ایدیسہدہ بکالری جزع و فزع نوعندن اولیوب یالکنز مبارک کوزلرندن یاش آقیدرلر ، صیحہ و نوحہ ایہ میت اوزرینہ آغلمقدن نہی بیورورلر ایدی .

حضرت رسول اکرمک مدت حیاتلرندہ ذات

رسالہنہایلرینہ اصلا اسنہ مک واقع اولدیغنی کبی آقصیرہ جقلری زمان دخی وجہ منیر نبویلرخی مبارک کیلہ اورترلر و دست شریفنی مبارک قاشلری اوزرینہ وضع ایدوب انہای عطسدہ مبارک صوتلرینی آہستہ ایدرلر و آقصیردقندن صوکرہ (الحمدللہ) دیرلر ، حق جل و علا حضرتلری آقصیرمنی سور ، اسنہ مکی سومنز بیورورلر ایدی .

﴿ فصل سادس ﴾

(جناب رسالتمآب صلی علیہ الوہاب اقدمن حضرتلرینک)
(افشای سلاملری بیانسدہ در)

حضرت رسول اکرم افشای سلامی سورلر و ہریردہ سلامہ اول کندولری باشلارلر ، ذات عالیٰ نبوتنہایلرینہ سلام ویرلسہ مثیلہ یاخوددہا افضلیلہ رد سلام ایدرلر و قطعاً رد سلامی تأخیر ایتزلر یالکنز اشارتلہ اکتفا بیورمززلر و آلدقلری سلام دخی ایشیدیلور ایدی .

کیجہ حجرہ سعادتہ کیرکن او یانق اولنلرایشیدہ جک و اویقودہ اولنلری او یاندریمہ جق درجہدہ سلام ویررلر ایدی . بر مجلسہ دخول و خروجلرندہ ، مسلم و مشرک بولنان بر مجلسہ دخی سلام ویررلر ، بر جماعت دیبانک و بر جماعت آسوانک یانلرندن تشریفلرندہ ہر ایکی جماعتہ

دخی سلام و یردکاری واقع ایدی . برکیمسه نك خانه سنی
تشریف لرنده قپو حذاسنه طوغری طور منز لر بلکه قپونك
صاغ یا خود صول طرفنده طور ورق (السلام علیکم)
دیو استیدان ایدر لر ایدی .

﴿ فصل سابع ﴾

(جناب رحمت جهان علیه صلوات الرحمن افدمز)
(حضرت تری نك اكل طعمی بیاننده در)

حضرت رسول اکرمك هر بر ایشنده حکیمانہ
حرکتی اولدینی کبی طعمی تناول بیورملری خصوصنده کی
حرکتلری دخی حکمتہ موافق ایدی . نبی اخر الزمان
افدمز اطعمه ده تکلف اختیار ایتدکاری کبی طیبات
اطعمه بی ده التزام ایتزلر ایدی .

طعام یرکن بغدادش قوروب او طور منز لر و بر طرفه
اتکا ایتزلر ، یا ایکی دیزی اوزرینه او طور ورلر یا خود
مارك صاغ آباغنی آلتنه آلهرق و مبارك صول آباغنی
دیگدرک طعمی اوله بر حال وهیئنده اكل ایدر لر ایدی .
مبارك جلوسلرنده دائما بر طرز اوزره او طور منز لر
بعض دفعه لر صاغ و بعضاً ده صول طرفنه یرصدیق وضع
ایله طیانیرلر لکن عادت باطله جاهلیه به مخالفت ایچون

انسانی طعامده بر شیئه طیانمقدن نهی ایدر لر و بن طیانیر
اولدیغ حالده اكل طعام ایتهم بیورور لر ایدی . بناء علیه
کرك صاغ و کرك صول طرفه طیانمق مسنون ، یرصدیق
یا خود دیگدر بر شیئه طیانهرق اكل طعام مطلقاً مذموم
و ممنوعدر .

سید کائنات افدمز مرتفع صوفره دن و کنساری
قیریق کاسه و سائر دن طعام ایتدکاری کبی صوفره ده
رفیقسنز یالکیز اكل طعامدن دخی حظ ایتزلر ایدی .
ذات رسالت پناه یارینه مخصوص قاب اولما قله برابر تناول
بیوردر قلیری قابدن دیگدر لیده یرلر ، کوله و جازیه
و خادملرینه قارشى یمده و ایچمه ده ، کیمه ده و او طور مه ده
ترفع و تعظم کوستر منز لر ایدی .

مباح ، هیچ بر طعمی تعیب و بکنمه مک ایتزلر ،
حاضر بولدق لری طعامه بسمله ایله بدأ ایدوب اوچ
پارمغیله اكل بیورور لر ایدی . طعامدن فراغت لرنده مبارك
پارمق لری بی بالار لر ، (اَلْحَمْدُ لِلّٰهِ الَّذِیْ اَنْظَمَ مَنَا وَ سَقَانَا وَ جَعَلَنَا
مِنْ الْمُسْلِمِیْنَ) دعاسنی او قورور ، طعامدن قالدق لرنده
مبارك دست شریف لری غسل ایدوب آرتان صو ایله
وجه جمیل انور لر نی مسح ایدر لر اصحاب کرامنه دخی

پارمق یا لامه لرینی ، کاسه و سائره صیرملرینی امرایدرلر ایدی .

حضرت رسول اکرم صلی الله علیه وسلمک تناول بیوردقلری اطعمه : قویون آتی ، پرین ، قوری ات ، طاووق آتی ، قباق ، قباق ایله مطبوخ چوربا ، بال ، حلوا ، سویق ، کش ، زیتون یاغی ، سرکه ، نازه خورما ، قوری خورما اولقله غدالرینی برشیئه حصر ایتمزلر ایدی . کاهی بروقته برنوع طعام اکل ایدوب وقت آخرده نوع آخر تناول بیورورلر ایدی .

سوت ایله بالقی اتنی ، سوت ایله اکشی شیرلی ، ایکی صغوق طعامی ، قاورولمش ات ایله پیشیرلمش اتی ، قوری ات ایله نازه آتی ، سوت ایله آتی ، سوت ایله یورطه نی ، قابض ایکی ماده نی بالجمع تناول بیورمزلر ویک صیجاق طعامی دخی برکتسز دیو صغوقمدقجه اکل ایتمزلر ایدی .

بین الاطعمه لحمی سورلر ، لحم سمعی تزئید ایدر ، دنیا و آخرتده سید الطعامدر بیورورلر ایدی . اکل و تناولی شرعاً مباح اولان لحوم حیواناتک قول و صرت طرفلرینی سورلر ، لحومک بورالری غایت لطیف و لذت

اولدیفنی سورلرلر ایدی . صوغان و صارمسانغی سومز و اکل بیورمزلر حتی قوقولرندنده اکراه ایدرلر ایدی . نزد هاپولرندنده نازه میوه لرك اطیبی : نازه اوزوم ایله قارپوز ایدی .

﴿ فصل نامن ﴾

(حضرت رسول الله صلی الله علیه وسلم افندمز)

(حضرتلرینک شربی بیاننده در)

حضرت رسول اکرمک هر فعلنده آداب مخصوصه سی اولدیفنی کبی صو و مشروبات سائره ایچون دخی آداب مضبوطه لری اولدیفندن مشروباتک آداب مضبوطه یه موافق صورتده ایچلمسی سنت سنیه نبویه جمله جمیه سندندر .

رسالتپناه افندمز آب مکرم زمزمی قائماً و مشروبات سائره نی قاعداً ایچرلر ایدی . قائماً صو ایچلمسی جائز اولدیفنه بناءً نادراً آباق اوزره ایچدکاریده مرویدر . صویک آباقده شربنه جواز وار ایسه ده (زمزم) شریفدن بشقه هر هانکی مشروبات اولور ایسه اولسون او طوره رق ایچمک اولی و افضلدر .

نبی اخر الزمان افندمز هر نه وقت صو و مشروبات

سائرہ ایچسہ لر اثنای شربده اوج دفعه نفس آلیرلر وهر نفسده بسمله ایله باشلا یوب بعدال فراغ (الحمد لله) دیرلر ایدی . صفوق و طاتلی صوی سوزلر ، بر مجلسده بولنانلره برشی ایچیره جک اولسه لر بعضاً ک صوکره کندولری ایچرلر بعضاً ده آنک عکسنی یاپارلر ایدی . مع مافیه صو ایچرکن صوره صوره و طوره طوره ایچلمسنی و صوقابنک ایچنه تنفس ایدلهمسنی و مؤذیات مضره دن رها اولمق ایچون ایچیه جک صویک داخل کورنسنی امر و توصیه ایدرلر ایدی .

﴿ فصل ناسع ﴾

(فخر کائنات افدمزک لویه مبارک لری بیاننده در)

جناب پیغمبر « صاع » لویه سعادت لرنیک عرض و طولندن قطع ایدرلر و لویه شریف لری ای اکثریا طرارلر و طرادق لری زمان آینه یه نظر ایدرلر ، محزون و غمناک اولسه لر لویه مبارک لرنی چوقجه لارلر ایدی . لویه سعادت لرندن آغارمش قیل قوبارمنی سومزلر ، بیغنی قرقیان کیمسه بزامت نجیبه مزدن دکدر بیورورلر ایدی . حضرت عائشه « رضی الله عنها » دن منقولدرکه

حضرت رسول اکرم حضر و سفرده عند نبویه لرندن (آینه) ، (سرمدان) ، (طراق) ، (خلال) ، (مسواک) بوبش شیئی اکسیک ایتمزلر و مبارک صقاللرنی طرارکن آینه یه نظر ایدوب (اَللّٰهُمَّ کَمَا حَسَنْتَ خَلَقْتَ فَحَسِّنْ خَلْقِي) دعاسنی او قورلر ایدی .

﴿ فصل عاشر ﴾

(نبی ذیشان علیه سلام الله المنان افدمزک بعض افعال)
(حسنه و سائرهمی بیاننده در)

جناب رسول کبریا ، صاغ ایله یر و ایچرلر ، ویره جکنی و آله جغنی صاغ ایله ویریر و آلیرلر ، صول النی دفع اذا واستجاده استعمال ایدرلر ایدی . مصافحه ، عادت سنیه لرندن اولوب دیار آخردن کنلر ایله ده معانقه ایدرلر ایدی .

نبی اخر الزمان افدمزک حلقه سی کوش ، قاشی عقیق حبشی دن معمول بر خاتمی وار ایدی ، که (محمد رسول الله) عبارته شریفه سی یازلمش یعنی برنجی سطری (محمد) ایکنجی سطری (رسول) اوچنجی سطری (الله) لفظه جلالی اولمقله اوج سطر اوزرینه ترتیب و حک ایتمدیرلمش ایدی .

مہر شریف مذکورى مبارك صاغ الك سرچہ پارمغہ
قاشى آووچى ايغنه كلهرك طاقنورلر واوزرنده محكوك
اولان عبارہ يہ تعظيماً خالايہ كيدركن مبارك پارمقرندن
چيقاريرلر ايدي .

ايسته بومہر شريف مذکور حضرت رسول اکرم
حالم بقايہ تشریف بيوردقلرى ساعتہ قدر دست عاليںدہ
قالوب بعدارتحال النبی « صلعم » حضرت ابوبکر الصديق
« رضی اللہ عنہ » و آنک ارنحالندہ عمر الفاروق وبعده
عثمان ذی النورين « رضی اللہ عنہما » حضرتانہ انتقال
ايتدی .

مدينه منوره « نورها اللہ الى يوم القيام » دہ قباہ
قريب بريستان ايچروسندہ (بئر اريس) تعبير اولنان
قيويہ مہر مبارك بقضاء اللہ تعالیٰ حضرت عثمانك لندن
دوشدى . اہتمام کلی ایلہ مہر مبارکی اراديلر ايسہدہ
بحکمہ اللہ تعالیٰ بولندى .

سرور کائنات افندمک جسمی نظيف ، قوقوسى
لطيف قوقو سورنسون سورنسون مبارك تن وترلرى
اک کوزل مسکدن دها کوزل قوقاردى .

وجود سعادتارندہ شول درجہ رايحہ طيبہ وارايدیکہ

هرهانكى برطریقندن تشریف بيورسہلر او طریقى ثابت
کوزل برقوقو استيعاب ايدر وذات اکرميلرني اوجوارده
کورمامش اولنلر بيلہ رايحہ طيبہ دلالتيلہ حضرت رسول
اکرمک او طریقندن تشریفارنہ حکم ايدرلر ايدي .
برکيمسہ اول نبی ذیشان ایلہ مصافحہ ايتسہ بتون کون
اول حضرتک رايحہ طيبہ سنى طويار و مبارك ایلہ بر
چوجفک باشنى مسح بيورسہلر اول چوجق سائرچوجقلر
آرہسندہ معلوم اولور ايدي .

ايسته بورايحہ طيبہ تعطر ايتمکسزين حضرت رسول
اکرمک خاصه نبولرندندر . مع مافيه کوزل قوقولى
ياغلى سور و تعطر و تطيب ايدينورلر ايدي .

رجالندن تعطر سنتى ارادہ ايدن کيمسہ ايچون وقت
تطيب (جمعه) ، (عيدين) ، (حين احرام) ، (حضور
مجالس) ، (قرائت قران) ، (وقت صلاة) ، (ذکر)
در . نساء ايچون آنحيق (حين ملاقات زوج) در .

جناب رسول اکرم « صلعم » افندمز امثالسز
واشباہسز صورتدہ ورع و زهد صاحبي ، ناسک رب العالمينہ
اعبدى ، مواطن ريب وشہادتدن ابعدى ايدي . چيلاق
بولمز حتى غسلندہ دہ اللہ عظيم الشانندن حياسنہ ميني

مستور بولنور ایدی . قضاء حاجت زماننده انسانلردن
اوزاق برلره کیدر دیوار ویا اناج کبی برحالتک وراسنه
کچوب دفع حاجت ایدر ، فضالتی ایسه ارض درحال
بلع ایدر ایدی .

حضرت رسول اکرم اصحاب کرامک خانهلرینی
تشریف بیورور و مجلس عالیارندن منقطع اولانلری سؤال
ایدرلر ایدی . مدینه منوره نك الك اوزاق محلنه قدرخسته
عیادتنه کیدرلر ، بلدیکی وبلمدیکی جنازه ده حاضر
بولنورلر ، هرکیم ذات اقدسلرینی برشی ایچون دعوت
ایتسه هان تشریف ایدرلر . تشریف بیوردقلری مجلسده
بولدقلری یره اوطوروب کندیلرینه موقع مخصوص
تخری ایتمزلر ایدی .

شفیع ام افندمز زده یونلرینه کلن مسافره اکرام
ایدرلر ، ضیوفدن هیج برطعامی دریغ ایتمیوب بولنانی
چیقارلرلر عکس تقدیرده مسافره قارشى صمیمیته اعتذار
ایدرلر ایدی . اصحاب حاجاتک حاجتی قضایه سعی ایدرلر
و مجلس مطلع النور رسالته غریب الدیار اولانلره اکرام
ایدرلر ایدی .

کلام و خلاصه مراسم نبی ذیشان افندمز سخی
TAHIR ERDEM
KUTUPHANESI

و کریم ، شفیق و رحیم ، شجیع و حلیم ، عهد و وعندنه
ثابت قولنده صادق و هرکسله معامله سی ملایم اولوب لیل
و نهارده هیج بر وقتی الله ذوالجلال حضرتلرینه طاعت
و عبادت یا خود منافع عامه مؤمنینه متعلق همتک غیرى
برشی ایله کچیره مشلر ایدی .

محبوب خدای علام افندمز بنیه و مزاج خصوصنده
فوق العاده قوتلی و اوقوتله متناسب اولمق اوزره عقلاً
جمیع مخلوقاتک ارجح و اکملی ، رأياً کافه عموم و
خصوصک افضلی ایدی ، که کتاب اوقوماش ، یازی
یازمامش اولدقلری حالده عوام و خواصک ظاهری
و باطنی امورنده واقع اولان حسن تدبیر و تصرفی ،
آفاق و انفسی انوار علوم و معارف ایله منور ایتدیکنی
بر عقل سلیم صاحبی تأمل ایتسه بلاتردد حضرت
رسول اکرمک نه مرتبه عقل و نه درجه فهم و زکاتی
اولدیغنی اکلار و تصدیق ایدر .

طبیاع و اخلاق عالیلرینه کلنجه . . . سائر اخلاق
حمیده ایله موصوف اولانلردن ارفق والین وقلوبه
اوفق ، قیسله جهندن جمله ناسندن اکرم و اشرف ،
و برکیمسه حسن خلقلرینه واقف اولمق املیسه ذات

رسالت پناه یاریه مصاحبت ایسه اول کیمسه جناب رسول
اکرمه محبت شدید ایله محبت ایدر حتی نبوت پناه افتدمز
اول کیمسه به کندی نفس کدن دها احب اولورایدی .

اللَّهُمَّ اغْفِرْ وَاذْحَمْ لِوُؤَلَفِ هَذَا الْكِتَابِ الشَّرِيفِ
مُحْرَمَةَ النَّبِيِّ الْكَرِيمِ وَلِوَالِدَيْهِ وَلِلْمُؤْمِنِينَ أَجْمَعِينَ .
وَصَلَّى اللَّهُ عَلَى خَيْرِ خَلْقِهِ مُحَمَّدٍ وَآلِهِ وَصَحْبِهِ أَجْمَعِينَ .
والحمد لله رب العالمين .

قدتم هذا الكتاب اللطيف في يوم الجمعة يوم التاسع
من ربيع الاول سنة ستمه وعشرين وثمائة والف .
من هجرة من له العز والشرف .

